

Saturday, June 28, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

11 YEARS OF NDA GOVT

BJP Mizoram President Pu Vanlalhmuaka'n Mizoram in mahni thutiamna ding leh tihtur sawi ang ti thin mi ram hruaitu a mamawh thu a sawi.

Akashvani Regional News Unit chuan kum 11 chhunga NDA sorkar hmalakna chungchangah BJP Mizoram President Pu Vanlalhmuaka leh Pachhunga University College a Political Science department Asst. Professor Dr Zonunmawia te a kawm a. BJP Mizoram President chuan NDA hnuaiah eirukna a tlem tih sawiin eirukna chu mipuite hmasawnna daltu a nih avangin eiruk awm lohna sorkar din chu an tum ber a ni a, hei hi sorkar hmasa aia an danglamna a ni a ti.

Mizoram pawhin mahni insawi anga ti thin ram hruaitu a mamawh tih sawiin BJP sorkar laipui chuan Mizoramah hmasawnna nasa tak a thlen a ni a ti a, Sairang thlenga rel lut thei tur leh kawngpui lian tak tak awm bakah Tuirial Hydel project hlawhtlinna hmuh chhoh mek a ni a , Lengpui Airport chu Union Home Minister Amit Shah an Mizo mipuiin changkang zawk leh International Aiport ni tura an duh avangin Airport Authority of India in a lak a ngai tih sawiin Chief Minister Pu Lalduhoma ko thla in, a hrilh tih a sawi.

Byte: BJP Mizoram President Pu Hmuaka

Dr Zonunmawia chuan Prime Minister Modi-a kaihhruaina hnuaia India-in tunlai thiamna a hman tangkai zia sawiin, thingtlang kilkhawr berah pawh pawisafai hmang kher lovin, Gpay hmangin pawisa a in thawn theih tawh a ti a, sorkar atanga hamthatna dawn thin, Gas subsidy chu bank account-ah a lut thei tawh tih sawiin lehkha pawimawh chu E-file system a kalpui a ni tawh a ti a, RTI chu online a tih theih ani tawh tih sawiin digital lama sorkar laipui hmalakna chu mipuiten an hriat a tul hle tih a sawi bawk.

Byte: Dr Zonunmawia

Kum 11 chhunga Prime Minister Narendra Modi-a kaihhruai NDA sorkar hmalakna hrang hrangte hi Mizoram chuan thil tam takah a chhawr mek a, Sorkar laipuiin chenna in zawng zawng tui connection an neih theihna tura a hmalakna, Jal Jeevan Mission hnuaiah Mizoram sorkarin thingtlang khaw hrang hrang a pek theih lohna khuaah tui hnianghnar taka pek mek a ni a. Ram pum huapa faina beihpui thlakna, Swachh Bharat Mission hnuaiah inthiarna vbc 12 sak a ni tawh tih a sawi bawk.



UD & PA MINISTER

Urban Development and Poverty Alleviation Department minister Pu K. Sapdanga chuan, YMA-in faina a buaipui chu a inhme hle a, Aizawl khawpui chhung veng hrang hrangte faina kawnga an intihsia tur chu lawmawm a tih thu a sawi baw.

Nizan khan Central YMA chuan Aizawl khawpui chhunga veng hrang hrangte faina kawnga intihsiakna neih turah inhrilhfi hna hun Tuikhuahtlanga Central YMA Hall-ah a buatsaih a, he hun hi UD&PA minister chuan a hman pui a.

Pu K. Sapdanga chuan, YMA-in faina a buaipui chu a inhme a, a phurawm baw a ti a. Tuirialah Damdawi In bawlhhlawh hrang hrangte paihna hmun siam a nih thu te; Tanhril daiah bawlhhlawh Tawihthei lo paihna tur siam mek a nih thu te a tarlang a. Siam zawh a nih hnuah chuan Tanhrilah bawlhhlawh Tawihtheih lo chauh paih a ni ang a, Tuirialah tawihthei chauh paih a nih tur thu a sawi. Hualngohmun ramah In sakna bungraw lian te paihna leh sawngbawl na paihna tur siam mek a ni baw, a ti. YMA-in faina kawngah tha a thawh ang a, sorkarin sum a tum thung ang. Veng fai inelna hian Aizawl khawpui chhung a ti fai thei ang, a ti.

Nikuma YMA Rorel Inkhawm vawi 4-na in a rel angin, faina leh thianghlimna kawnga inzirtirna turin kawng hrang hrangin Central YMA chuan hma a la mek a. Hemi bawhzuina pakhat atan Central YMA, UD&PA, Aizawl Smart City Ltd leh AMC te chuan Coordination Committee dinin Aizawl khawpui chhunga veng hrang hrangte faina faina kawnga inelna a buatsaih dawn a lawmman hi nakum Chapchar Kutah sem a ni ang.

CYMA buatsaiha hun hmanah hian UD& PA Department-in veng tina dah tur Bawlhhlawh Bawm pahnih theuh Branch YMA tinah a sem nghal baw a. Inhmuh khawmnaah hian Aizawl khawpui YMA Branch 85 aiawh an kal a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.

